

LETTRES ES-

crites par Monsieur
le Comte de la Chap-
pelle a diuerſes per-
ſonnes la vueille de ſa
mort.



A PARIS,
Chez FIACRE DEHORS, Libraire
au Mont S. Hilaire.
M. DCXXVII.
Avec Permission.

LETTERS


Letter from Mr. M. to
the Council of the
City of New York
dated 17th Nov. 1791

Case
F

39

326

1627d



ALBANY
JANUARY 1792
RECEIVED
OF THE
CITY OF NEW YORK



A MADAME DE BOYTEVILLE.

M Adame ma chere Cousine,
 Si vous auez moins de Vertu, ie
 n'entreprendrois pas dans vn deplaisir ex-
 treme comme est le vostre, de vous donner
 des consolations. Vous auez perdu tout ce
 que vous pouuiez perdre, mais toute la Frã-
 ce perd avec vous. Il estoit ieune, mais il
 ne pouuoit plus acquerir d'honneur dans
 le monde. Qu'attendiez vous autre chose
 de son courage, qu'une fin precipitée qui
 eust perdu le corps & l'ame? Vous ne l'a-
 uez possédé que dans les continuels perils,
 & Dieu qui par miracles a tousiours con-
 serué sa vie, vous donne ceste puissante
 consolation qu'il le vous oste pour le pren-
 dre pour luy. Resiouyſſez vous-en Mada-
 me, au moins si vous l'aymez, comme i'en
 suis tres-assuré. Que vostre deplaisir ne
 vous face pas abandonner vos enfans, qui
 ont besoin d'estre esleuez sous vostre aile:
 apprenez leur ce que vous auez si abõdam-
 ment, à viure dans le monde avec tant de
 vertu. Ne changez pas vostre condition, &

vous voulez estre la plus estimée femme de
vostre siecle, comme Monsieur vostre ma-
ry l'estoit parmy les hommes. Chere Cou-
sine, ie vous fay part de la consolation que
i'ay de luy faire compagnie, & vous recom-
mande de tout mon cœur ma pauvre petite
Mere; Dieu la vueille benir, & vous con-
soler. Je suis,

M A D A M E,

Vostre

A MADAME DV HALLOT.

MADAME,
 Si Dieu, qui vous a tousiours aimée, ne vous auoit esprouuée par des afflictions plus rudes que ne vous fera pas ma mort, ie craindrois dans vostre vieillesse qu'ellen'esbranlast vostre constance. mais c'est trop peu perdre apres les pertes que vous auez faictes. Et celuy qui vous enuoye ces afflictions, vous a tresbien pourueu de ses graces pour y pouuoir resister. Je suis assure, ma bonne Mere, que vous louerez Dieu de ce qu'il a eu pitié de mon ame, qui estoit perduë, s'il n'y eust pourueu, comme il luy a pleu faire par sa bonté. Toutes les morts sont trop heureuses quand elles nous meinent en Paradis; Et celle de nostre Sauueur la plus honteuse selon le monde qui aye iamais esté, c'est celle là mesme par les merites de laquelle nous sommes tous sauuez. Je ne doute point aussi, que la perte de Monsieur vostre neveu ne vous touche extremement. Mais pour consolation ie vous puis assurer, qu'il la reçoit comme ie fays aussi, comme vne

grace particuliere de Dieu, laquelle vous
 ne deuez point plaindre, puis que l'ame est
 infiniment plus precieuse que le corps, &
 que Dieu qui est nostre Maistre semble
 auoir voulu partager avec le monde. Je
 m'en vay le prier, ma tres-honorée Me-
 re qu'il vous continuë ses saintes benedi-
 ctions, & vous supplie de croire que ie
 meurs

Vostre

7
A MADAME DE MONTAIGV.

MA tres-chere sœur, Puisque Dieu nous a voulu assembler dès deuant que nous vinssions au monde, dans le ventre de nostre Mere, ie croy estre obligé puisque ie le quitte le premier, de prendre congé de vous. Si vous estes affligée de ma mort, vous vous resiouyrez sans doute de mon salut, lequel i'attends de la misericorde de Dieu. En cela suis-ie plus heureux que vous que ie quitte le premier vn lieu ou nous offençons tous les iours sa bonté infinie, & moy plus que personne. Mais il ne m'a traicté selon mes fautes, ses misericordes qui sont sans nombre, se sont estendus iusques à moy : Je l'en louë de tout mon cœur, & vous conuie ma chere sœur par l'amitié que i'ay tousiours veü que vous auiez pour moy, de l'en remercier aussi. Seruez vous des graces qu'il vous a faictes, & continuez vostre vie iusqu'à la fin aussi vertueusement que vous auez faict iusques icy; & plus encore si vous pouuez. C'est vn passage necessaire que celui de la mort; Et ie croy qu'il ne faut rien plus dire pour de-

meurer en la crainte de Dieu. Je ne vous
donne point de consolation du monde, par-
ce que c'est toute badinerie, & ceux qui
n'en font que trop, vous en donneront as-
sez. Je suis tres-humble seruiteur de Mon-
sieur vostre mary, & de M.M. le Marquis
de Canisy, & de ma chere cousine sa fem-
me: & sçay que sans doute ils me plaindrōt,
& beaucoup d'autres de mes amis que j'ay
auprès de vous. Ils auront tort. Qu'ils iu-
gent de mon bon-heur, non pas parce que
ie quitte, mais par la grace que Dieu me
fait. Adieu, chere sœur: Vous ne sçauriez
penser en l'autre monde, que vous ne mes-
prisiez fort celui-cy.

Je suis

Vostre

2
A MONSIEUR DE BEVRON.

Monsieur mon cher amy, Il y a dix ans que ie fais estat de l'honneur de vostre amitié, & que vous possédez mes plus cheres affections. Il est raisonnable que ie prenne congé de vous. C'est le suiet de celle-cy : car des consolations, vostre esprit beaucoup meilleur que le mien, vous en donnera assez. Je reçois ce que les autres nommeront mal-heur, pour le plus grand bien qui me peut arriuer. Et apres ma creation & ma redemption pour la plus grande obligation que i'aye à IESVS-CHRIST. I'estois perdu, sans doute, s'il ne m'eust perdu de la sorte. Ha! que ma perte est heureuse, puis qu'elle me faict gagner le Ciel. Je louë Dieu de ce que vous ne vous estes pas trouué embarrassé comme nous, car i'ay tousiours connu assez de crainte de Dieu dedans vostre ame, pour croire que vous retournerez à luy. Nostre exemple vous y doit seruir, & vous puis asseurer que mes prieres ne vous y manqueront pas, si elles sont agreables à nostre Seigneur. I'ay desplaisir de ne vous auoir pas assez seruy, & peut-estre

B

croirez-vous que ie n'aye pas assez chery
vostreamitié, mais il en est tout autrement.
Ie n'ay point eu de plus forte passion. Je
vous en ay voulu asseurer en mourant, &
pour la dernière priere que ie vous feray ia-
mais, ayez memoire de moy, & croyez qu'il y
a sans doubte vn Dieu tres-iuste qui nous
laisse traifner nostre lien, auquel aussi bien
que moy vous rendrez vn iour vostre conte.
Adieu cher amy, Je suis

Vostre tres-humble
seruiteur.

*A Messieurs de Molac de la Hunaudaye,
& de Montafilane mes freres.*

MEs tres-chers freres,
Mon mal-heur est assez grand, ma mort assez estrange, & ie reconnois assez d'amitié en vous pour croire que vous auez besoin de quelque consolation pour le monde. Ma mort est bien esloignée de honte puis qu'elle se perd avec celle de mon cousin de Bouteuille, & pour son seruice. I'auois tousiours désiré le dernier, mais le premier est le seul desplaisir que i'y trouue, & pour ne m'arrester pas à de si mauuaises raisons. Considérez, mes chers freres, que c'est vn miracle que Dieu qui est infiniment bon a voulu faire pour le salut de nos ames. Ie reçois ceste mort pour le plus grand bien qu'il nous peut enuoyer, puis qu'il ne me reste du monde qu'vn desplaisir d'y auoir si mal vescu, & que i'ay sa parole, qui est tousiours infailible, qui m'assure qu'il me pardonnera mes pechez, luy en demandant pardon, ce que ie fais du meilleur de mon ame. Chers freres, si vous me permettez en

ce dernier periode de ma vie de vous donner mes conseils, prenez exemple sur nous, pour iuger ce que c'est que le fort honneur du monde. Quant à moy, si i'estois en vos places, ie me refoudrois à mener la vie de nos Peres, qui est de viure dans nos maisons en la crainte de Dieu, & dans le seruice que nous deuons au Roy: c'est vn lieu où l'on peut seruir Dieu, & faire ce qu'il commande sans estre accusez de lascheté: & dans la Cour cela est comme impossible. I'en ay assez de connoissance pour le dire librement, & apres tous les honneurs que l'on y peut receuoir, il est tres-assuré que les plus heureux que i'y aye veu, ont beaucoup plus de mauuaises heures que de bonnes, de déplaisirs que de plaisirs. Vne vie innocente, tousiours egale, & qui n'est pas mal plaisante, comme celle que pouuez trouuer en vostre prouince, vous conduira doucement à la fin de vostre vie, car c'est tousiours la conclusion. Pardonnez-moy, chers freres, mais ie croirois vous faire vn grand seruice, si en mourant ie vous pouuois oster de l'abyfme où vous estes; dans lequel il faut autant de miracles, que Dieu veut fauuer d'hommes. Je vous supplie tres-humblement de faire

mes baise-mains à mes plus chers amis, ie n'en ose nommer pas vn, de crainte de desobliger les autres; & aussi remerciez ceux qui nous ont fait l'honneur de s'employer pour nous, encore que tout nostre bonheur procede de ce qu'ils ont trauaillé en vain, dont ie rends graces à Dieu, lequel ie priera eternellement pour vous, & pour eux. Je vous supplie d'en faire autant pour nous. Adieu, chers freres, Dieu vous vueille consoler. Je suis,

Mes chers freres,

Vostre

IE supplieray Monsieur de Bouteuille, d'auoir agreable que mon corps soit enterré avec le sien, & pour mon cœur, ie seray bien aise qu'il soit mis dans le tombeau de nos Peres. Vous ferez faire vn seruice pour moy aux Chartreux, ou i'auois tousiours resolu de finir mes iours. Je croy que c'eust esté bien tost.

Je vous supplie de tout mon cœur, de n'a-

noir aucun souuenir de tous ceux qui ont
 - peu estre cause de nostre prise : car Dieu ne
 nous pardonne, qu'à condition que nous
 leur pardonnions, & moy ie ne vous par-
 donneray iamais, si vous en faites autrement.
 Apprenons de nostre Sauueur à prier Dieu
 pour ceux qui nous persecutent, & pour
 ceux qui particulièrement sont cause de
 nostre salut.

